

愚

齋

存

稿

愚齋存彙卷第八目錄

奏疏八

英國商約議竣畫押摺

密籌英約第八款辦法片

請將前刪免稅各項仍照稅司辦理片

請設勘礦總公司摺

請撥陝振餘款作勘礦總公司第一次官股片

鐵廠派員出洋片

遵旨籌辦陝振陝捐彙案具報摺

查放陝振收支清單並附

南洋公學歷年辦理情形摺

資送學生出洋游學片

奏留奏派南洋公學總辦提調片

電商添設水陸各線懇 恩保護摺

請准何其坦送部引見片

請獎電局員生片

愚齋存彙卷第八

奏疏八

英國商約議竣畫押摺

光緒二十八年九月  
商約大臣呂會奏

江督張

奏爲英國商約定議遵

旨畫押謹將約本恭摺

進呈仰祈

聖鑒事竊

臣

海寰

臣

宣懷先後奉

旨派令議辦商約並著前兩江督

臣

劉坤一及

臣

之洞

會商籌定接准英使馬凱開送商約二十四款

臣

等悉

心查核所索無一非損我權利將必不可允各款立予

嚴詞駁拒擇其無大關係者徐與磋商俾得從容籌計而馬凱開議後動以和議大綱第十一款中國已允商改利益爲要挾其用意尤重在豁除釐金開通商務臣等一面往復電商皆以加稅方能免釐爲商約主腦尤須自行籌定扼要辦法庶不慮有喫虧復電商軍機處外務部戶部亦謂機不可失遂向其明索加稅允以裁釐將有關稅釐各款屏不與議堅持定見操縱互施彼爲商論阻撓故允而復翻議而復改者不止一次臣海寰臣宣懷終不敢放鬆一步五月杪復邀同馬凱偕赴江鄂與前督臣劉坤一臣之洞共籌抵制協力辯爭彼

見無可要求始漸就範計已磋磨八閱月之久聚議六十餘次之多舌敝唇焦不遺餘力所有籌議加稅免釐一款於未議定以前經臣海寰臣宣懷專摺詳晰奏陳於定議以後前督臣劉坤一與臣之洞復合詞電奏及奉

旨責令前督臣劉坤一臣之洞切實通籌從長酌議亦經單銜分別奏覆仰荷

聖明允如所請此外各款均經臣等隨時會電具奏內惟第十款內港行輪續經妥訂章程第十一款通商口岸權利其議列三條馬凱自行翻悔堅請刪除係由前

督臣劉坤一及臣之洞遵

旨再行詳慎籌商電臣海寰臣宣懷與馬凱再四妥議

會奏請予照准統核馬凱索議二十四款駁拒未允入約者七款曰洋鹽進口曰內地僑居貿易曰郵政電報曰設海上律例曰整頓上海新衙門曰口岸免釐界限曰貨物同在一河免復進口稅議定後而又刪除者一款曰通商口岸利權歸入加稅免釐款內併議藉爲抵制者五款曰新開口岸曰減出口稅曰三聯單曰子口單曰常關歸新關管理商允改妥者十一款曰存票曰整國幣曰廣東民船與輪船納稅一律曰華洋合股曰整

頓珠江川江曰推廣關棧曰保護牌號曰加稅免釐曰  
礦務章程曰內港行輪曰穀米禁令此就馬凱原送款  
目而分別准駁刪改歸併者也臣之洞等復向馬凱索  
議彼允入約者三款曰治外法權曰籌議教案曰禁莫  
啡鴉皆我補救

國計民生要圖幸就範圍實有裨益馬凱於定議後復  
補請入約者兩款曰修改稅則年限曰約文以英文爲  
憑核係查照舊約辦理爲約中應有之義其計十六款  
其時臣海寰等接馬凱來函臣之洞等接馬凱來電皆

稱七月二十七日定期起程回國臣之洞等電留不允



並聞英商多以此約無多利益意圖謀阻深虞中變是以先行會電具

奏並將全約款文電達外務部代爲

進呈欽奉七月二十五日電

旨昨據劉坤一張之洞等電奏與英國使臣馬凱議定商務全約等語既據該督等會奏稱屢經妥酌定議卽著呂海寰盛宣懷就近畫押仍將各條與劉坤一張之洞悉心詳核辦理一切務臻妥善儻有後患惟該督等是問欽此當卽欽遵照會馬凱去後馬凱又因約內附件應照原議恭錄會奏加稅撥補裁釐辦法原奏及所

奉

諭旨照會載入方能畫押七月二十六日欽奉

明降諭旨一道馬凱閱後以加稅撥款字義尙難解釋

各國洋商疑慮堅不畫押

臣海寰

臣宣懷再三開導竭

力磋磨始與馬凱商妥不必將

上諭刊入約章僅將七月十九日會奏及奉

批准日期作爲附件較爲得體並傳

臣

之洞等之意慰

留緩行旋奉七月二十九日電

旨劉坤一呂海寰等電奏悉所有十九日電請旨一節

仍著責成劉坤一張之洞妥酌如果別無用意確無流

弊卽行傳旨著照所請欽此等因當經前督臣劉坤一  
臣之洞查明馬凱所請加稅之款意在不得抵原撥釐  
金五百萬以外之洋債賠款及挪作別用恐各省再在  
貨物收捐業已先後奏明此外似別無用意亦無流弊  
遵卽傳

旨著照所請

臣

海寰

臣

宣懷於八月初一日奉到卽照

知馬凱本訂初二日畫押馬凱又接英廷來電必欲增  
敘詳明以慰加稅洋商之意並接駐英使臣張德彝來  
電亦稱英外部謂擬加之稅務須

明降諭旨歸督撫提用否則不能畫押等語似英廷語

意總慮稅加而釐不能撤臣海寰臣宣懷詳細審度彼

來照會雖請全數撥還各省而內敘各省向解北京及  
應還洋債仍如數照撥我復照會聲明應撥各項卽留  
存海關聽候戶部與各省商定抵解將來戶部如何商  
定派撥劃抵由我自主彼亦無從過問且現議賠款易  
金還銀正以我財力竭蹶爲言則加稅聲明只抵裁釐  
不涉賠款可見毫無盈餘藉可杜各國之口似此辦理  
匪獨於我無損實於我有益畫押已延多日仍恐別生  
變故卽於八月初四日亥刻會同英使馬凱在上海畫  
押蓋印業已先行會電具奏在案伏思戰後立約彼旣

要求多端萬不能一無所允然允則於彼有益於我卽屬有損此理之顯而易見者臣等不得不權其輕重設法挽回但能補救一分卽可少受一分之虧損臣等受恩深重敢不竭盡心力會商妥籌惟期有裨

國用無害民生一己之毀譽在所不計固不敢畏難遷就貽患將來尤不敢瞻顧欺蒙稍涉粉飾綜論全約利益彼此似尙得其平此西報嘗議馬凱所由來也卽如日本近甫開議口岸加稅兩端均未肯如英國所議但求各國皆無異言能悉如英約所載各款而行則此次商約尙無損虧商務可期進益然非仰賴

聖謨訓誨周詳曷克臻此至核對華洋文一事極關重要臣海寰臣宣懷皆不識洋文誠恐原派繙譯之道員陳善言知縣溫宗堯或未能詳盡復添派精於英文之郎中李維格知府伍光建漢口稅務司賀璧理各就英文繙譯向來條約以洋文爲憑必須漢英文一律方免日後爭論並電請外務部飭派候補五品京堂曾廣銓來滬按照各該員所譯漢文逐加校對定以賀璧理譯本爲準因該稅司係

特派隨辦商約之員是以照辦旋准馬凱索取所譯漢文由彼校定卽以賀璧理譯本送交去後馬凱派其幫

辦傑彌孫亦素習中國語言文字者重加校核復函

臣

海寰

臣

宣懷請派道員楊文駿及賀璧理溫宗堯三員

前往再公同考訂閒有酌改字句之處稟經核明於意義無甚出入始予更正其稍有不當必令多方辯論須僉稱符合而後已嗣承准軍機處養電令將所印洋文由江鄂滬三處詳細校對再行核定電商前督

臣

劉坤

一

臣

之洞往復斟酌以畫押在卽若候洋文寄至江鄂

覆校萬趕不及且江無洋文好手堪任其事卽鄂派員前往亦屬太遲滬校旣經數次實已愼益加愼前經會奏陳明並將馬凱校對增改之處附奏更正是以未敢

再事拘泥致誤畫押之期謹據實詳陳以釋宸廑所有英約告竣遵

旨畫押緣由理合合詞恭摺具報並將約本漢英文各一分

進呈

御覽再此摺因前督臣劉坤一患病以致會稿稽延現已因病出缺是以未經會銜合併陳明伏乞

皇太后

皇上聖鑒訓示謹

奏 十月初二日奉



硃批外務部知道約本併發欽此

密籌英約第八款辦法片

光緒二十八年九月  
張商約大臣呂會奏

江督

再英約十六款內以第八款加稅免釐一事爲全約緊要關鍵將來辦理得當則財政必興若稍不得宜則齟齬易啟雖此款須俟各國允行訂期開辦係在一年以後然亟應綢繆未雨方免臨事周章臣等係原議之人不得不詳晰陳明以便預籌布置查該款第三節載現有常關處所須開單照送存查而聲明載在戶部工部則例及

大清會典者恐各省府關有在應留之列亦可作爲常關列入單內以免扞格惟須由部密飭各省妥酌辦理

其有洋關而無常關之處以及沿海沿邊而非通商口岸之處恐釐卡撤後民船易於繞越偷漏業經議定允我設法安設此外新開各口岸如應設立海關則常關亦應一併添設倘舊有常關地段不足以資控制應移改至扼要處所亦宜預爲籌改更正入單俾昭妥協而免藉口至常關稅則須改照海關稅則辦理是否卽以海關稅則爲準抑另行估計可否飭由總稅務司核議之處應候戶部會商外務部核奪又第五節載土藥稅局所地址開單照送存查應由各省按照此節所載辦法妥爲查開又第六節載鹽釐改爲鹽稅或產鹽地方

抽收或在銷售省分入境第一局抽收並任便設立各項鹽報驗公所凡船隻按照鹽引運載鹽者須在該公所停船候驗蓋戳放行將來釐卡一裁必須嚴飭鹽稅及掣驗各局所不得查驗別項貨物及有留難情事又第八節所載銷場稅係專爲行銷內地土貨而設師落地捐之意而避落地捐之名然不得侵及進口洋貨暨出洋土貨方不致貽人口實征收多寡雖可由我自定义似亦不能有逾值百抽五以致貧民受困惟非民生日用所必需及僅止富貴家所用貴重之物則可從重征收此項稅則各省斷難一律然必須由部通行各省將

向征貨物就各省物價銷路情形酌擬抽收之數咨部再由部彙核分別酌定數目其征收處所如何別分抽收之法亦須由各省體察情形預訂妥善章程則將來加稅免釐屆期舉辦各省胸有成竹自可措置裕如至開辦之期裁釐與加稅同時並舉仿照洋藥稅釐併征新章辦法自無脫節之慮亦應由戶部會商外務部札飭總稅務司先事妥酌所有預籌第八款辦法緣由是否當理合附片密陳伏乞

聖鑒飭部核議施行謹

奏 十月初二日奉

硃批外務部戶部妥議具奏欽此

請將前刪免稅各項仍照稅司辦理片

光緒二十八年九月江督張

商約大臣呂會奏

再臣海寰臣宣懷前准英國日本國所派商稅專使馬

凱日置益等美國所派專辦稅則使臣沙爾德暨德法奧比等國所派駐滬總領事請派員會同按照和議大綱估修進口貨切實值百抽五稅則卽經遴委隨辦商稅之稅務司賀璧理戴樂爾會同估修議定業經繕訂成冊會列前督臣劉坤一臣之洞後銜專摺奏報奉硃批外務部知道欽此並承准外務部皓電內開應卽遵照畫押等因按和議大綱與議者共十一國前以俄

日等國尙未派員當經電請外務部照會該公使查照旋准部電以上年新約葡瑞等國均未與議葡累有微詞此次修改稅則應否一律知照派員會議復經電覆凡通商各國均應知照並與馬凱等議明此次估修稅則各國派員會議先後不一先到各國既不願候後到之國一同畫押自應按照國數各備漢洋文一冊以便畫押後即可各自互換馬凱等僉以爲然並於冊首聲明現訂稅則以後如查明某貨係未載在稅則者卻無窒礙之處仍能遵照議和條約所指逐色收稅之辦法現今聲明此次公議簽押之各國均可會同中國再行



公訂某貨應當納稅若干添載稅則之內等語免致後  
到各國有所藉口遂訂七月二十六日臣海寰臣宣懷  
與各國公同畫押開辦之期彼此定爲本年十月初一  
日舉行計到者爲奧國比國德國英國日本國和國日  
國又因美國議稅專使沙爾德不及候

批旨先行回國並與各國私相畫押未免藐視殊屬有  
礙主權臣等電屬駐美使臣伍廷芳告知美外部另派  
其駐滬總領事古納於八月初五日續行畫押法國丹  
國與各國一同議訂稅則而畫押未到或須候俄國同  
辦亦未可知此次畫押之時各國猶以我於稅則內善

後章程第二款原開免稅項下刪去各種貨樣及民人行李暨自用之物並民人家內雜用之物爲總稅務司於和議大綱訂定之後頒示各關訓條仍許免稅者請仍照舊列入臣等以前經

奏明有案再三堅持不允馬凱調停變通辦法議由各國另備照會請我允照總稅務司所發與各關遵行之訓條辦理不必列入善後章程之內質之稅務司賀璧理戴樂爾面稱總稅務司確有此訓條自不得不允將前刪免稅各項仍發交總稅務司呈明外務部按照和議後所發與各關遵行訓條辦理以免兩歧除將已經

各國畫押稅則漢洋文各八分並鈔錄各國照會暨照  
復咨呈外務部查核辦理外謹合詞附片陳明伏乞  
聖鑒訓示謹

奏 十月初二日奉

硃批外務部知道欽此

請設勘礦總公司摺

光緒二十八年九月

奏爲礦地亟宜自守擬請設立勘礦總公司藉保主權而收礦利恭摺密陳仰祈

聖鑒事竊維強國之道必先富國歐洲多以開礦致富而中國礦產尤爲繁盛歷來成見拘泥或官禁或民禁精華闕而未發此天之留以畀我

聖清蔚成中興之業實不可假手於人者也近今風氣始開知礦務不可以終遏但迫於時局礦權礦利幾不能由我自操於是海內寶藏之區輒爲他人攘而有之或因案交涉一入條款而某省之礦柄暗授彼國矣或

被人勾引一給字據而某府某州縣之礦產多屬他商  
矣外務部鑒於前弊重訂章程無論華洋商皆可承辦  
礦務均須先稟外務部俟批准後方可爲准行之據原  
欲於推廣之中竭力設法限制聞外國頗以准其購用  
地畝自行舉辦爲喜而猶以抽稅過重爲憾臣於去年  
五月曾接准軍機大臣電告礦務所關甚鉅誠如所論  
亟宜以開爲守各國合式律例望卽擇要採取其應如  
何抵制之處亦望熟籌電知以便核議請

旨辦理等因嗣因英使馬凱來議商約內有礦務一條  
臣等以事關內政拒不入約到鄂後馬凱猶堅持礦事

有關商務必欲列入商約以慰英商之望

臣

思要在保

我地權方能以開爲守督

臣

張之洞頗以爲然當與

臣

等會商允於一年內自行將英國印度連他國現行礦務章程迅速認真考究採擇其中所有與中國相宜者將現行章程改修安定以期主權無礙利權無損並於招致外洋資財無礙於礦商亦不致有虧等語美國雖甚和平亦索礦務條款並密告

臣

曰中國地產之精華將悉爲各國有矣吾美國亦當分沾其益蓋歐洲覬覦中華礦利極想一網打盡按照英約一年內自行修改若不預爲商籌猶恐臨時周章或藉端要挾仍不免墮

其術中臣既奉軍機處諮詢在前又身在議約大臣之列晝夜焦思悉心討論中國既無辦礦之人才又無開礦之資本自李鴻章等議辦礦務以來合南北計之集中國資本師西法開採以見成效者僅有開平大冶萍鄉三礦而已開平以李鴻章北洋大臣之魄力唐廷樞一生之苦心孤詣越二十年而始成之然一經變亂已爲外人乘機攫取大冶萍鄉一鐵一煤互相濟用臣與張之洞先後持堅忍之力經營締造勉力圖成萬里版圖祇此兩礦良可慨已其他無窮無盡之地寶若不早爲設法保全一聽外人明取暗索數年之後盡屬他人

將來中土人才輩出能自舉辦而產礦美地已非我有  
徵諸五洲大邦斷無如此辦法然默究其所以不能自  
辦之故以辦礦之人才非十餘年不能造就開礦之資  
本非數百萬不能動手若必欲強華商自辦誠如外務  
部所言暗中必仍是勾結外人輾轉售賣矣臣年來訪  
察中外情形終欲思一補救之法斷非空言大言所能  
濟事而必先量我權力財力所能辦到惟有將民間產  
礦之地由公中籌款自購力爭先著而已然欲得知何  
地產礦必先有人代爲選礦而後可行三十年前德國  
有一地學師勒安芬徧查中國礦地著爲圖說近來各



國謀辦礦者游歷內地或以教士出名或以華人出名購得各省礦地已屬不少甚有一洋人而購數十礦者近日上海武昌均有洋人設立驗礦廠凡內地覓到各礦均歸化驗彼已布置齊備而我仍漠然置之真可爲天下後世所痛惜今當掃除空言力求實事提綱挈領自保地權亟宜設立勘礦局遴選地學師勘明何地實在產礦自行購買以歸中國公司事機已迫萬難再遲臣不揣鄙陋一面諄勸各省紳商先籌華股本銀一百萬兩擬在上海設立勘礦總公司於去年函商出使大臣羅豐祿訪求頭等地學礦師一年之久始得一人名

瓦理士布魯特每年薪水英金二千鎊一切用費在外  
羅豐祿交卸後卽由張德彝代訂合同已於八月內到  
滬臣親與考究其礦學確係諳練地學在歐洲專門勘  
驗礦地與尋常祇知開礦之學者不同臣已飭令先往  
湖南省勘查各礦先經電商撫臣俞廉三深以此舉爲  
保礦善法一面函商各督撫派員赴各省預查產礦處  
所再行陸續派往勘驗無論出產煤鐵五金之地可資  
開採者卽與地方官安定公平之價由局購買再令該  
礦師將所勘之礦擇尤繪圖立說某礦應如何開辦約  
需資本若干能獲餘利若干分作等差編立字號再行

次第招商認辦俟外務部路礦總局議訂新章務令遵照

欽定礦例辦理所有勘礦公司購到礦地編號之後如有合例商人承辦卽當會同該省督撫咨明外務部路礦總局請給牌照方准開辦臣愚以爲中國所有者產礦之基地也外國所有者開礦之資本也我能守我之地不爲他人所奪將來以我礦地或作資本或採租息皆當權自我操總之礦商之利外人不妨其之而地主之權中國當自守之亡羊補牢尙未爲晚曲突徙薪豈容再誤所有擬設勘礦總公司藉保主權而收礦利各

緣由理合據實密陳是否有當伏乞

皇太后

皇上聖鑒訓示謹

奏 本月二十五日奉

硃批外務部戶部知道欽此

請撥陝捐餘款作勘礦總公司第一次官股片

光緒二十八年

九月

再臣擬設勘礦總公司目前以驗礦購地爲要義將來卽以礦地作股本爲指歸臣之愚見若能仿照阿非利加將產礦之地悉歸諸官再由官出租發給牌照准令中外商人遵照例章註冊領地開辦實足爲

朝廷籌鉅餉不特保主權已也本年三月

臣

電商外務

部將來承辦洋人到部遞稟時能否將該商買地仍歸中國官買或租給若干年或以地作股當接部電官爲買地川省有此辦法各省能否多籌官款以備購地之

需俟隨時釐訂礦章再行詳酌等語臣以爲購地不難而難在勘礦如勘度非人必至少者爲我所取美者爲人所得是以選擇礦師調度勘驗均關緊要現在上海擬設勘礦總公司並化驗司鑛地司繪畫司至少先集股本銀一百萬兩每股銀一百兩共成一萬股每股每次收銀二十兩分作五次收齊若全歸官股恐如外務部所言各省能否多籌官款尙無把握倘再牽掣耽延勢必盡落後著並恐歸官之後仍難免爲外人藉端勒索若全歸商股其權操自

朝廷其利亦不致外溢英法德美藏富於商皆是此意

惟

國家現以籌款爲急務似此振興美利之舉應爲上下相共之謀泰西路礦大舉有國者每多入股既可爲臣民之倡亦足厚宮府之需中國欲圖富强似不可不破除迂拘之見臣再四籌維該公司股分莫善於官商各認其半譬如官股五十萬兩應認五千股第一次每股付銀二十兩計銀十萬兩如蒙

俯采芻蕘准如所請臣查代辦陝西義振獎款除遵旨撥濟各省振濟外尙存銀十萬兩可否仰懇

俞允卽以此項捐獎餘款撥作勘礦總公司官股第一

次本項較爲迅速俟刊印票式恭呈

御覽嗣後應付第二第三第四第五次股銀各十萬兩  
隨時容<sub>臣</sub>接續奏請或由部撥或由各省分籌萬一試  
辦無效<sub>臣</sub>當責成該公司華商賠繳銀十萬兩毋庸續  
領以重公款<sub>臣</sub>爲保守礦地推廣籌餉起見是否有當  
謹附片密陳伏乞

聖鑒訓示謹

奏 本月二十五日奉

硃批外務部戶部議奏欽此



鐵廠派員出洋片

光緒二十八年九月

再湖北鐵廠

臣

接辦後招集商股設法借墊共銀三百

二十餘萬兩數載以來因鍊鐵焦煤運費過繁化鐵爐座又須重造虧折商本至一百四十餘萬之鉅猶幸鋼鐵精純足供製造槍礮路軌之用萍鄉煤礦已成鐵路漸可通運外國經營鐵廠輒需數千萬日本新建一廠其國家籌本二千萬尙議增添六百萬

臣

所接辦之鐵廠並須兼營開煤鍊焦互相鉤連方能濟用近又自行籌借禮和洋行四百萬馬克約合銀一百五六十萬商借商還以圖推廣而免中輟

臣

於此事艱苦忍耐雖當

無米爲炊仰屋而嗟終不敢被外人所誘奪如再能堅持數年岳州至萍鄉鐵路工成焦炭足敷運用自當添置爐座機器將臣等所管轄鐵路需用之鐵料皆取給於此可塞漏卮歲以數百萬計其成效必在輪船電報之上惟製造必須取法於人耳聞不如目見臣久思親赴各國一觀其布置而未得其暇祇得遴派妥員代往考核茲查有總辦湖北鐵廠三品銜候選郎中李維格心精力果體用兼賅本來諳熟方言近復留心工學臣與李維格堅明約束鐵廠之成敗利鈍悉以付之今春順天府府尹臣陳璧保薦人才該員澹於榮利而矢志

辦成一事以答

高深夫用人之道必當用其所長尤當久於其任若用之不專或朝令暮改皆不足盡其才也臣已代籌資斧派令該員帶同洋工程司一名尅日馳赴日本先閱其新開鐵廠卽由日本放洋赴泰西各國游歷各廠究其工作精奧之大端彼何以良我何以楮彼何以精我何以麤他山之石借以攻錯並飭就便添購機器選募匠師該員歸來必能爲鄂廠增益規模徐收功效臣所以不敢沾沾於目前自限其程度也所有鐵廠派員出洋各緣由理合附片具陳伏乞

聖鑒訓示謹

奏 本月二十五日奉

硃批外務部知道欽此

遵

旨籌辦陝振陝捐彙案具報摺

光緒二十八年九月

奏爲遵

旨籌辦陝西義振並代辦陝捐核明收支各款彙案具

報恭摺仰祈

聖鑒事竊

臣

於光緒二十六年九月欽奉

上諭飭令籌辦陝西義振遵卽商同駐滬紳商先行墊款解交嚴作霖隨帶赴陝辦理急振一面勸捐歸補一面陸續接濟旋准

行在戶部另文頒發實官銜封等項執照由

臣

代辦陝

西振捐時值北方軍務未平東南雖稱安堵而觀望遲

回捐務遽難踴躍當經遴委熟悉捐獎之直隸記名道張振榮前川東道任錫汾等在上海設立總局悉照順直秦晉振捐章程派員分路勸辦光緒二十七年八月奉

旨實官一律停捐欽遵限期亦經截數咨部在案茲據張振榮等呈報滬局共收捐項銀一百二十六萬一千五百五十二兩八錢四分又

行在戶部籌撥米價銀三萬五千兩又銀十萬兩又各省官紳捐振銀十六萬二千九百七十一兩一錢五分八釐統計列收銀一百五十五萬九千五百二十三兩

九錢九分八釐據嚴作霖周寶生潘民表等先後稟報  
查放邠州永壽縣等處計十九州縣災振並借給籽種  
等項共支陝西省振銀九十一萬一千五百三十兩四  
錢五分九釐又分撥山西省振銀七萬七千九百九十  
三兩五錢三分九釐又迭奉

諭旨飭撥江蘇省振銀十萬兩安徽省振銀十萬兩江  
西省振銀十萬兩又撥江蘇省鎮江府屬太平洲振銀  
一萬兩江江西省南昌九江兩府屬振銀四萬兩又奉撥  
四川省振銀十二萬兩共支各省振銀五十四萬七千  
九百九十三兩五錢三分九釐統計列支銀一百四十

五萬九千五百二十三兩九錢九分八釐尙存銀十萬兩聽候撥用由該員紳等分別稟請奏銷前來臣等覆核無異謹彙繕清單恭呈

御覽除咨戶部查照外理合會同陝西撫臣升允恭摺

具陳伏乞

皇太后

皇上聖鑒訓示謹

奏 本月二十六日奉

硃批戶部知道單併發欽此



謹將義紳嚴作霖等查放陝振災民戶口支用銀米各  
數目繕具清單恭呈

御覽

計開

收款項下

一收

行在戶部撥銀十萬兩

一收

行在戶部撥米價銀三萬五千兩大米六千五百石

一收安徽鳳穎六泗道馮煦撥曹平銀五萬兩折合庫

平銀四萬八千九百七十一兩一錢五分八釐

一收工部郎中劉錦藻捐振銀六萬兩

一收升任江蘇蘇松太道余聯沅捐振銀一萬兩

一收升任江蘇蘇松太道蔡鈞捐振銀一萬兩

一收候選郎中李松壽捐振銀一萬兩

一收鍾王氏唐李氏陳盧氏朱李氏各捐振銀一千兩

共捐銀四千兩

一收嚴作霖集捐銀二萬兩

一收上海設立陝捐總局共收捐銀一百二十六萬一

千五百五十二兩八錢四分

以上共收大米六千五百石銀一百五十五萬九千五百二十三兩九錢九分八釐內除撥山西省振銀七萬七千九百九十三兩五錢三分九釐撥江蘇安徽江西三省振銀各十萬兩共三十萬兩又撥義紳劉芬等查放江蘇鎮江府屬太平洲振銀一萬兩撥義紳劉芬韓景珪等查放江西南昌府義振九江府工振銀四萬兩又撥四川省義振銀十二萬兩外實收銀一百一萬一千五百三十兩四錢五分九釐

支款項下

一支嚴作霖等查振邠州災民計三萬三千一百六十

九戶大小折成大口八萬四千六百六十七口先辦急振後分三次散放共支大米一千五百九十八石二斗五升五合銀十萬七千四百三十二兩四錢二分九釐又撥借籽種錢合銀四千八百五十三兩八錢八分三釐

一支嚴作霖等查振永壽縣災民計二萬二千六百九十四戶大小折成大口五萬八千一百十四口半先辦急振後分四次散放共支大米九百九十七石四斗四升銀十一萬三兩八錢九分四釐

又撥借籽種錢合銀四千八百五十三兩八錢八分三

釐

一支嚴作霖等查振三水縣災民計二萬一千八百五十三戶大小折成大口七萬二千九百四十五口先辦急振後分兩次散放共支銀九萬四千一百十五兩二錢六分二釐

又撥借籽種錢合銀四千八百五十三兩八錢八分三釐

一支嚴作霖等查振淳化縣災民計一萬四千八百四十一戶大小折成大口五萬二千八十三口半先辦急振後分兩次散放共支銀六萬六千四百二十四兩七

錢五分七釐

又撥借籽種錢合銀四千八百五十三兩八錢八分三釐

一支嚴作霖等查振長武縣災民計一萬八百九戶大小折成大口三萬三千十口半先辦急振後分三次散放共支大米九百三十石六斗銀三萬三千五百兩九錢二分五釐

又撥借籽種錢合銀一千一百四十五兩五錢一分六釐義倉備荒麥子一千十石合價銀六千四百兩

一支嚴作霖等查振乾州災民計二萬七千九百三十

二戶大小折成大口七萬八千三十五口先辦急振後分三次散放共支大米一千四石一斗二升五合銀十一萬六千四百二十六兩三錢四分六釐

又撥借籽種錢合銀六千六十七兩三錢五分四釐

一支嚴作霖等查振武功縣災民計一萬四千三十七戶大小折成大口三萬五千八十五口先辦急振後分兩次散放共支大米九百六十九石五斗八升銀三萬九千九十三兩四錢八分六釐

又撥借籽種錢合銀三千六百四十兩四錢一分二釐一支嚴作霖等查振岐山縣災民計一萬四千五百四

十七戶大小折成大口三萬一千八百二十七口先辦  
急振後分兩次散放共支銀六萬九千八百七十一兩  
一錢四分三釐

又撥借籽種錢合銀三千七百三十三兩七錢五分五  
釐

一支嚴作霖等查振扶風縣災民計二萬二千九百六  
十四戶大小折成大口六萬五千七百三十五口半先  
辦急振後分兩次散放共支銀七萬一千八百五兩三  
錢九分四釐

又撥借籽種錢合銀六千六十七兩三錢五分四釐



一支嚴作霖等查振興平縣災民計八千九百二十七戶大小折成大口二萬一千九百九十四口半先辦急振後辦散放共支大米一千石銀三萬九百十二兩五錢四分七釐

又撥借籽種錢合銀二千九百十二兩三錢二分九釐  
一支周寶生等查振蒲城縣災民計一萬六百九十一戶大小折成大口三萬一千二百口共支銀二萬六千兩

一支周寶生等查振富平縣災民計七千二百三十四戶大小折成大口一萬八千七百六十七口共支銀九

千四百八十二兩

一支周寶生等查振白水縣災民計六千三百五戶大小折成大口一萬四千六百二十口共支銀一萬二千一百八十三兩三錢三分四釐

一支周寶生等查振高陵縣災民計五千七百八十戶大小折成大口一萬四千二百五十口共支銀九千五百兩

一支周寶生撥交三原縣辦理粥廠並散放籽種共銀一萬三千二百兩

一支周寶生撥交三原縣粥廠麥子六萬觔合價銀六

千五百四十九兩二錢七分

一支潘民表等查振同官縣災民計五千八百八十六戶大小折成大口一萬六千一百九十五口共支銀一萬六千九百五十五兩六錢六分五釐

一支潘民表等查振洛川縣災民計五千二百二戶大小折成大口一萬三千二百四十五口共支銀一萬一千五百五十三兩七錢八分五釐

一支潘民表等查振中部縣災民計五百八十七戶大小折成大口一千四百五十一口共支銀一千六百六十五兩四分

一支潘民表等查振宜君縣災民計三千六百七十二戶大小折成大口一萬一百七十六口共支銀一萬二千六百八十八兩五錢三分七釐

又撥給牛價籽種銀二千七百八十四兩三錢九分三釐

以上共支大米六千五百石共支銀九十一萬一千五百三十兩四錢五分九釐

存款項下

一存銀十萬兩聽候撥用

南洋公學歷年辦理情形摺

光緒二十八年九月

奏爲敬陳南洋公學歷年辦理情形請

旨遵行仰祈

聖鑒事竊

臣

於光緒二十二年十二月十二日奏請由

輪電兩局集捐籌辦南洋公學以育人材奉

硃批該衙門知道欽此欽遵在案開辦而後六年於茲其始風氣未開薦紳子弟觀望不前來學者大率寒賸爲多且有來而復去者迨去冬新政

詔下各省人士承流仰風以公學無籍貫畛域之分自願入學者遂屬至而不能徧錄此誠見多士嚮學之誠

亦足徵

聖世作人之化桴鼓相應捷於影響也查公學所分設之目凡八曰上院視西國專門學校肄習政治經濟法律諸科曰中院視西國中學校肄習中西文普通諸學曰師範班視西國師範學校肄習師範教育管理學校之法曰蒙學堂視西國小學校專教幼童爲中院儲才之地分高等補習二級略如西國尋常高等之意曰特班變通原奏速成之意專教中西政治文學法律道德諸學以儲經濟特科人才之用其附屬公學者曰譯書院專譯東西國政治教育諸書以應時需及課本之用

曰東文學堂考選成學高才之士專習東文講授高等普通科學以備譯才曰商務學堂當以中院卒業學生遞年升入並招考外生另延教習分門教授以備將來權稅興商之用計師範開於二十三年中院開於二十四年蒙學堂開於二十五年特班東文班開於二十七年上院則以現在生徒卒業者除已派出洋外所留無多先設政治專班爲預科俟隨後考升再行定期開辦商務學堂尙須添建房屋專延教習大約二十九年可以開辦此臣六年來辦理南洋公學之大略情形也公學係商捐經費學資不出於一方士籍不拘於一省襟

江帶海負笈羣趨以開辦最先一節言之實與日本江戶之開成所學堂情形相似江戶後定都爲東京於是開成所與昌平黌合併而爲東京大學彼所處之地得託首善以正名誠非上海一隅所能望伏讀光緒二十七年八月初二日

上諭飭令各省普設學堂十月二十五日

上諭允准政務處禮部所議學堂選舉鼓勵章程並准山東先建之學堂照此次所擬章程一律辦理等因公學創辦於奉

旨之先與山東同其兼備中學小學於一地亦與山東



同其上院課程較山東學堂且高一級在

朝廷振興學校培育人才自無不優予鼓舞第

諭旨未見明文而南洋公學亦無省府州縣之名可居  
比擬爲難等級未定諸生遂不免長慮卻顧甚或輟業  
他往廢於半途蓋風氣之開也在先而出身之定也居  
後其有向隅之歎抑亦人情所不能免者伏查新頒

欽定高等學堂章程第三節內開如大省物力富人才  
多十年之後其功課程度眞足與大學規模一律即可  
稱爲大學堂又如繁富之府廳州縣地方及通商大埠  
雖非省會若能創設與高等學堂程度相等之學堂亦

可稱爲高等學堂等語又考泰西諸大學校多在通都大邑民物殷盛之區各省府不能盡建鉅費各鉅費亦不必盡在省府其不仰給於國家經費者若英若美所在多有並係紳商集款建設爲特別之大學堂其學生卒業給憑與國家大學堂學生身分無異是則準諸定章徵諸西制公學事例正與相同擬請

朝廷

明降諭旨准南洋公學卒業學生照政務處禮部所擬學堂選舉章程一律辦理並明定該公學爲南洋高等公學堂所有卒業各生卽由臣與南洋大臣江蘇學臣

會同考校咨送京師大學堂以資鼓勵而符名實今時  
艱孔亟需才正殷諸生已有五年功課自較各省新入  
學堂者所造爲深其卒業亦將在各省學生之先此  
所以不能不汲汲上請者也至特班諸生尤多雋異之  
材他時成就諒有可觀除俟擇尤咨送恭應經濟特科  
外所有南洋公學辦理情形及選舉章程籲懇

天恩

明降諭旨與各省學生一律辦理並定爲南洋高等公  
學堂各緣由理合恭摺具陳伏乞

皇太后

愚齋存彙

卷八

三

皇上聖鑒訓示謹

奏 本月二十九日奉

硃批管學大臣議奏欽此

資送學生出洋游學片

光緒二十八年九月

再各省學生資送出洋游學迭經奉

旨飭辦欽遵在案茲又欽奉

懿旨諭令各督撫選擇學生籌給經費派往西洋各國

游歷以備任使等因欽此

臣

維學生必出洋游歷躬驗

自治專門肄習乃能窺西學之精用其所長補我之短  
現在各省各局所司洋務能通語言文字者皆係昔年  
總理衙門及曾國藩李鴻章沈葆楨派赴出洋之學生  
尙惜限於經費未能卒業專門之學今蒙

朝廷飭催各督撫選擇學生出洋誠爲急切要著伏查

近年游學日本諸生計由官給資及自備資斧前往者不下七八百人而遠涉歐西寥寥可數雖人情囿於近便實亦道遠費多措資匪易遂致觀望不前各省督撫臣深知學生出洋游歷之益一則學堂工夫須有七八年普通學已成或將成者方能得益而甚難其人一則經費每人每年約需銀二千兩連川資書籍造就一人非萬金不辦如普通學未成難入其高等學堂而以一人赴外洋肄業之費可資中國學堂數人之費是以選擇學生更難於籌給經費也臣所設之南洋公學及天津頭等學堂資格較深曾已分次選擇高等學生陳錦

濤章宗祥胡鵬運李福基曾宗鑒胡振平趙興昌王寵  
佑王寵惠薛頌瀛胡棟朝嚴錦榮吳炆靈張煜全譚天  
池江維善程錫培王建祖梁鉅屏徐田吳治儉等二十  
一名皆由臣派赴英美美國大學校肄業或由公學籌給  
經費或由該學生自行籌集資斧又有不由臣學堂出  
身而由臣招致咨送赴英國肄業高等學生沈成鵠金  
紹城金堂金紹基陳永箴陳永漢唐康泰唐榮鈞徐廷  
勳張勉昌等十名近來學堂內外及諸生聞風而起接  
踵願往尙不乏人惟臣已無款可籌以後如有學業可  
期造就而資斧實在難籌者容臣咨商各督撫設法酌

量資送以慰諸生嚮學勇往之忱用副

朝廷造就人才嘉惠學生之至意是否有當謹附片具  
陳伏乞

聖鑒訓示謹

奏 本月二十九日奉

硃批知道了欽此



奏留奏派南洋公學總辦提調片

光緒二十八年九月

再南洋公學創辦之初由臣遴派已故三品銜分省補用知府何嗣焜爲總辦一切章程規制該故員手定爲多何嗣焜故後續派在籍刑部郎中沈曾植爲總辦嗣奉外務部奏調回京當差該學總辦一席頗難其選適值翰林院編修汪鳳藻由本衙門咨送南洋游學臣素稔該編修學術閎正兼貫中西足爲多士矜式卽函訂來滬延充該學總辦視事以來生徒翕服現當整頓學規擴充教育之時正賴相助爲理合無仰懇

天恩俯准飭下該衙門將編修汪鳳藻留於上海總辦

南洋公學事宜俾收啟迪之效又該學總提調一員有  
督率生徒稽察課程之責甚關緊要查有候選知府伍  
光建志堅行卓尤邃西學堪以派充謹附片具陳伏乞  
聖鑒訓示謹

奏 本月二十九日奉

硃批著照所請該衙門知道欽此

電商添設水陸各線懇

恩保護摺

光緒二十八年九月

奏爲電商認籌鉅本購造水陸各要線力顧大局籲懇  
天恩維護以保權利而恤商艱恭摺仰祈

聖鑒事竊自光緒二十六年拳匪倡亂

畿輔電線首先被燬南至津沽北至張家口西至保定  
東至山海關千餘里間同時拆毀南北梗阻人心皇皇  
未幾聯軍入都

乘輿西幸洋兵佔踞京津先設行軍電線而我軍書文  
報旁午絡繹徒恃驛遞轉輾濡延加以全權大臣入京  
議款機密重要尤賴電傳四達消息靈通其時各國官

商軍民旅居京津者傳遞外洋各報初用快艇送至煙台轉電彼國繼乃說合大北大東水線公司由大沽至上海自設水線以便直達業將機器料物運屯香港勢在必行臣探聞此信益用焦灼若聽其自設不特和戰未定之時彼靈捷而我隔閡相形見絀且事權一失利益隨之竊慮中外接線之界限臣所斷斷於平素者一旦盡撤防閑其妨礙於一時者固多而關係於他日者尤大用是傳集各商董一再從長籌議僉謂津沽一隅盡爲外人佔守卽欲迅速修造規復舊制其道無由反覆詢謀計無所出臣殫思竭慮幾廢寢食默念大北大

東兩公司與電局共利有年自訂齊價合同本有互相維持之約今眾西商雖有自設水線之議大北大東兩公司實操其權不如因其所圖移爲我用然非聯之以情餌之以利事必不諧遂一面密商全權大臣故大學士李鴻章一面卽派電局參贊道員朱寶奎同知周萬鵬等授以機宜令與該公司駐滬總辦委婉陳說脣焦舌敝始獲轉圜維時和議未成京津洋兵嚴守軍律若使偵知此舉勢必多方阻撓復商令大北大東允假洋公司之名密將已備水線料物售歸電局仍由該公司代爲安設緣此周折該公司益復居奇故昂其值計自

大沽繞煙台至上海水線一條需價英金二十一萬鎊約共合銀二百萬兩左右當以事迫燃眉無從令其貶價惟

朝廷多事之秋既不敢以籌款上煩

宸厪而華民又值凋敝之際電商魄力未雄似此鉅資何能咄嗟立辦因念該公司志在牟利又與熟商將該款作爲息借以所設水線作抵每年五釐起息分三十年攤還清款歸線商借商還遂於是年九月密訂合同分執信守又其時京沽陸線不通地非我轄勢難修造不得已再出重價購料鳩工復由該公司商允各國聯

軍從大沽代造陸線以達京師並分設京津兩處電局暗中仍由臣派委員學生司理電報由是

行在與京師消息貫通幸無阻礙亦無漏洩並與密訂合同載明俟和議告成地方平靖卽交還電局自行管理乃該公司自恃有德於我不免時形要素迫款議大定而京津還線之約英俄兩國互相掣肘種種推延經臣再三辨詰派員理論積牘盈寸閱時經年迄無就緒現由臣咨請外務部與英俄丹國駐京使臣磋磨商酌一面與該公司坦懷相示理喻情商允以交還全線之後將京至恰克圖陸線借給大北京至大沽陸線借給

大東各一條俾通出洋電報幸獲持平了結應俟另訂  
合同簽押後即可收回京津線局以符原議總計此舉  
曠時積日勞精敝神首尾三年乃有結束追維籌議之  
初事機萬變閒不容髮從權辦理實出於無可如何幸  
賴眾股商深明大義合力同心不惜巨資襄茲要舉復  
以旅順威海膠州青島等處各國相繼自設水線以達  
煙臺深恐其接至天津則我所造海線又難自立且大  
沽至煙臺一線本屬不敷傳遞故又添設沽煙副線共  
需英金四萬八千鎊約共合銀四十萬餘兩亦於是年  
十二月訂立合同悉照前議辦理以上各借款每年分



兩期拔還計歲需本息銀十五六萬兩兼以水線修費  
十倍於陸更須逐年寬籌臣詳覈電局度支歷屆出入  
本無贏羨今則進項未能驟旺用款業已銳增移緩就  
急酌盈劑虛無非股商膏血在微臣力圖補救董勸兼  
施分所應盡而眾商力顧大局急公奉上之忱實有不  
可泯沒者議者動謂中國商人自營私利不顧公家之  
急臣愚以爲華商力微志小囿於積習無怪其然然使  
在上者竭力扶持平日以信義交孚臨時以尊親相勗  
縱不能如西商之投匭千萬遇有緩急當必勇於輸將  
卽如此次電股各商羣爲其難亦其明證惟補苴有待

既相與維持於今日不能無冀望於將來幸際  
朝廷振興庶務首重恤商惟有仰懇

天恩俯念電商爲

國家大局起見集資宏鉅守業艱難優予格外維護勿  
使中道蹉跌方能責令清償借款不至上累公家電商  
幸甚微臣幸甚除將前後所訂合同咨呈外務部查照  
存案外所有電商添設水陸各線資本艱鉅應有權利

籲請

天恩允准保護各緣由謹恭摺具陳伏乞

皇太后

皇上聖鑒訓示謹

奏 十月初一日奉

硃批外務部知道欽此

請准何其坦送部引見片

光緒二十八年九月

再臣創辦電報歷年既久舉凡購料估工悉與西國公司參互考核一事一物皆有定程張家口外沙漠荒磧承辦之員率以工作艱難藉詞糜費而俄國以恰克圖電線係總理衙門奉

旨訂定期限建設不容稍緩時日臣於光緒二十五年二月改派已革在任卽選道江西餘干縣知縣何其坦前往建設先經

奏請俟全工告竣查明期限用費電工三者符合程度籲懇

天恩從優給獎否則立予懲究奉

旨該衙門知道欽此嗣以何其坦辦事勤奮操守廉潔限內工竣據實奏保於光緒二十五年十二月欽奉

硃批准其開復原官欽此旋准部議以被議人員未經咨部率行差遣於例不符聲請更正逮北方匪亂直隸全省電線被燬各路消息梗阻南北機緘全賴煙臺接轉其時各國兵船麇集派兵持械佔我電局臣派何其

坦前往駐守會同局員督飭學生晝夜遞報免誤機要及至上海煙臺大沽海線造成煙局稍可放鬆乃查近京至張家口外電線電桿被燬殆盡臣以何其坦奮勇

耐苦卽行籌款奏派前往修復並請將何其坦交臣差遣委用二十七年九月三十日奉

旨著照所請該部知道欽此臣卽責令兼程往修尅期通報俾免外人藉口是該員搏節創造於前復冒險承修於後工關邊防交涉洵屬著有微勞伏查光緒十六年二月前署雲貴督臣譚鈞培以降調道員李必昌總辦滇邊電工出力奏請開復原官銜翎並免繳捐復銀兩奉

旨允准光緒二十六年十二月廣東撫臣德壽以已革花翎知府用江西德安縣知縣朱士林襄辦洋務出力

奏請開復原官升階以知府留於廣東補用奉

旨著送部引見以同知留於廣東補用今何其坦所辦之事較李必昌爲堅苦重難而原參係牽連被議又與朱士林同在一案無分輕重

朝廷愛惜人材至公至大況屬時事孔亟隨在需才屢奉

上諭如有才猷卓越克濟時艱無論官階大小出具切實考語迅速保薦以備錄用等因欽此欽遵在案臣查何其坦心精力果勇敢有爲不特歷冒險阻異常出力屢試其才開展切實堪濟時艱合無仰懇

天恩俯念人才難得廢棄可惜准予送部引

見候

旨錄用之處出自

逾格鴻施

臣

實爲激勵人才起見除履歷咨部外謹附

片具陳是否有當伏乞

聖鑒訓示謹

奏 十月初一日奉

硃批何其坦著送部引見欽此



請獎電局員生片

光緒二十八年九月

再庚子七月以後

行在政務煩劇

詔旨頻頒加以東南保護之約全權議和之役京師及  
各行省各使臣往來問答萬里瞬息悉惟電局是賴維  
時臣卽嚴飭各該局員學生諭以事機危迫傳遞官電  
皆關重要倘該員生等或不小心致有洩漏或所轄桿  
線損壞致有阻滯定必從嚴懲辦如能線路暢通遞報  
愼密定必從優獎敘通行在案計自軍興而後以迄

回鑾各該局懍遵

臣

諭悉能奮不顧身晝夜不息幸未

貽誤要公

臣

復於和局定後褒其成勞許以

奏獎各該員感激企望爲日已久似未便失信於下僚

且現議商約京滬江鄂往返會籌仍賴電音通達督

臣

張之洞屬

臣

以要電如不遲誤應許優給獎勵夫用人

之道激其將來必先勉其已往伏查

行在官電局委員學生均經請獎仰蒙

恩准已照異常勞績優敘欽遵在案京城官電局員亦

經外務部咨明

臣

處酌核辦理各局員生著有微勞事

同一律容

臣

隨後嚴加汰核擇尤保獎伏望

天恩俯准以資鼓勵而免向隅謹附片具陳伏乞

聖鑒訓示謹

奏 十月初一日奉

硃批准其擇尤酌保毋許冒濫欽此

愚齋存稿卷第八